



**ՀԱՅԱՍՏԱՆԻ ՀԱՆՐԱՊԵՏՈՒԹՅԱՆ ՍԱՀՄԱՆԱԴՐԱԿԱՆ ԴԱՏԱՐԱՆ**

---

**ԴԱՏԱԿԱՆ ԿԱԶՄԻ ՈՐՈՇՈՒՄ**

**ԱՆՀԱՏԱԿԱՆ ԴԻՄՈՒՄԻ ԸՆԴՈՒՆԵԼԻՈՒԹՅԱՆ ՎԵՐԱԲԵՐՅԱԼ**

Քաղ. Երևան

27 մայիսի 2026 թ.

Սահմանադրական դատարանի դատական կազմը՝

Նախագահությամբ՝ Հ. Հովակիմյանի

Անդամակցությամբ՝ Ա. Զեյնալյանի

Դ. Խաչատուրյանի

Քննության առնելով Մարիամ Մարտիրոսյանի անհատական դիմումի  
ընդունելիության հարցը,

**Պ Ա Ր Զ Ե Ց .**

1. Մարիամ Մարտիրոսյանը (այսուհետ նաև՝ Դիմող, ներկայացուցիչներ՝ փաստաբաններ Ազատ Շահբազյան, Կարինե Լալաբեկյան) դիմել է Սահմանադրական դատարան (դիմումը Սահմանադրական դատարան է մուտքագրվել 2026 թվականի մայիսի 15-ին)՝ խնդրելով.

«1. Անհատական դիմումով գործը քննության ընդունել:

2. ՀՀ քաղաքացիական դատավարության օրենսգրքի 394-րդ հոդվածի 1-ին մասի 2-րդ կետի հիմքով, այնքանով, որքանով վճարել բողոքը վարույթ ընդունելը մերժելու փաստարկների և հիմնավորումների բավարար չլինելու հիմքում դրված եզրահանգման հետ մեկտեղ, չի պարունակի նաև դրան հանգեցրած պատճառաբանությունը, ճանաչել ՀՀ Սահմանադրության 61-րդ, 63-րդ, 75-րդ, 78-րդ, 79-րդ և 81-րդ հոդվածներին հակասող և անվավեր:

2. ՀՀ քաղաքացիական օրենսգրքի 317-րդ հոդվածի 2-րդ կետը և 337-րդ հոդվածի 1-ին կետը ճանաչել Սահմանադրությանը համապատասխանող՝ այն մեկնաբանմամբ, համաձայն որի՝ «պարտավոր էր իմանալ» կամ «պետք է իմացած լիներ» հասկացությունները վերաբերում են այն իրավիճակներին, երբ գործարքն անվավեր ճանաչելու համար հիմք ծառայող հանգամանքների մասին տեղեկացված լինելու ընդհանուր տեղեկությունը ներառում է իրավունքի խախտման մասին բավարար և կոնկրետ տեղեկությանը, վճռորոշ նշանակություն ունի նաև այն պահը, երբ անձը տեղեկանում է ոչ միայն իրավունքի խախտման մասին, այլ նաև այն մասին, թե ով է խախտողը և ում դեմ պետք է ուղղվի պահանջը:

3. ՀՀ քաղաքացիական դատավարության օրենսգրքի 379-րդ հոդվածը ճանաչել Սահմանադրությանը համապատասխանող՝ այն մեկնաբանմամբ, համաձայն որի՝ վերաքննիչ բողոքը քննելիս Վերաքննիչ դատարանը սահմանափակված է ներկայացված բողոքի հիմքերով և հիմնավորումներով և իրավասու չէ արձանագրել այնպիսի խախտման առկայությունը, որը դուրս է և հայցի իրավական հիմքի և վերաքննիչ բողոքի հիմքերի և հիմնավորումների շրջանակներից, որը համապատասխանում է ՀՀ Սահմանադրության 61-րդ հոդվածի 1-ին մասով, 63-րդ հոդվածի 1-ին մասով և 81-րդ հոդվածի 1-ին մասով երաշխավորված անձի դատական պաշտպանության և արդար դատաքննության հիմնական իրավունքների և ազատությունների վերաբերյալ Սահմանադրությունում ամրագրված դրույթներին»:

2. Ներկայացնելով թիվ ՇԴ/3074/02/17 քաղաքացիական գործի դատավարական նախապատմությունը՝ Դիմողը գտնում է, որ «(...) Դատարանը Օրենսգրքի 337-րդ

հողվածի 1-ին կետի հայցային վաղեմության ժամկետի ընթացքի սկիզբը կապել է ոչ թե իրավունքի խախտման օրվա հետ (այսպես կոչված «օբյեկտիվ չափանիշ»), այլ այն օրվա հետ, երբ հայցվորն «իմացել է կամ պետք է իմացած լիներ իր իրավունքի խախտման մասին» (այսպես կոչված «սուբյեկտիվ չափանիշ»): Նմանապես, գործարքի անվավերության հայցերով, Օրենսգրքի 317-րդ հոդվածի 2-րդ կետը հայցային վաղեմության ժամկետի ընթացքի սկիզբը կապում է այն օրվա հետ, «երբ հայցվորն իմացել էր կամ պարտավոր էր իմանալ գործարքն անվավեր ճանաչելու համար հիմք ծառայող հանգամանքների մասին»:

Դիմողը կարծում է, որ «(...) Դատարանի վճռում Օրենսգրքի հայցային վաղեմության ժամկետի ընթացքի սկզբին վերաբերող դրույթները չեն համապատասխանում իրավական որոշակիության սկզբունքին և տեղիք են տալիս դրանց տարաբնույթ մեկնաբանման համար»:

Ըստ դիմողի՝ «(...) Օրենսգրքի «պետք է իմացած լիներ» և «պարտավոր էր իմանալ» սուբյեկտիվ չափանիշներն ունեն նույն՝ «պետք է իմանար» իմաստը»:

Վկայակոչելով Սահմանադրական դատարանի ՍԴՈ-630, ՍԴՈ-753, ՍԴՈ-1176, ՍԴՈ-1270, ՍԴՈ-983, ՍԴՈ-1271 որոշումները՝ Դիմողն արձանագրում է, որ «(...) Օրենսգրքի՝ հայցային վաղեմության ժամկետի ընթացքի սկզբին վերաբերող դրույթները չեն համապատասխանում իրավական որոշակիության սկզբունքին, ուստի տարաբնույթ մեկնաբանման տեղիք են տալիս»:

Դիմողը փաստում է, որ Վերաքննիչ դատարանը, դուրս գալով դատական ակտի և վերաքննիչ բողոքի հիմքերի և հիմնավորումների սահմաններից, դատական ակտով սահմանել է հայցային վաղեմության իրավունքի պաշտպանության նոր ժամկետ, այն է՝ գործարքի, դրա անվավերության հետևանքների կիրառման մասին հայց հարուցելու իրավունք է սահմանել մինչև 17.07.2022 թվականը ներառյալ, մինչդեռ ոչ առաջին արյանի դատական ակտում, ոչ վերաքննիչ բողոքում այդ հարցը քննարկման առարկա չի հանդիսացել, այսինքն՝ Վերաքննիչ դատարանը վերաքննության պայմաններում վերաքննության փուլում վերանայման օբյեկտ է դարձրել ստորադաս դատարանի կողմից չկայացված բողոքարկվող դատական ակտի վերաքննիչ բողոքի հիմքերի հիմնավորումների սահմաններում չներառված հարցը:

Դիմողը կարծում է, որ «(...) Վերաքննիչ դատարանի կողմից թույլ են տրվել ՀՀ Սահմանադրության 61-րդ հոդվածի 1-ին մասով, 63-րդ հոդվածի 1-ին մասով և 81-րդ հոդվածի 1-ին մասով երաշխավորված անձի դատական պաշտպանության և արդար դատաքննության հիմնական իրավունքների և ազատությունների վերաբերյալ Սահմանադրությունում ամրագրված դրույթների, ինչպես նաև Հայաստանի Հանրապետության վավերացրած՝ մարդու իրավունքների վերաբերյալ միջազգային պայմանագրերի խախտումներ, հաշի չի առնվել դրանց հիման վրա գործող մարմինների պրակտիկան, դատական ակտը վերաքննիչ բողոքի հիմքերի և հիմնավորումների սահմաններում չվերանայելով»:

Դիմողը գտնում է, որ «Նման պայմաններում վերաքննիչ դատարանի կողմից իրականացված վերանայումը չի ապահովել բողոքարկման ինստիտուտի բովանդակային իրացումը և կրել է ձևական բնույթ, ինչը հակասում է արդյունավետ դատական պաշտպանության իրավունքի էությանը:

Վերաքննիչ դատարանը բողոքի քննության արդյունքում մերժել է վերաքննիչ բողոքը՝ առանց պատշաճ գնահատման արժանացնելու բողոքում բարձրացված բոլոր էական հիմքերը և առանց յուրաքանչյուրի վերաբերյալ եզրահանգում անելու, ինչով խախտել է ՀՀ քաղաքացիական դատավարության օրենսգրքի 379-րդ հոդվածի պահանջները:

Նման պայմաններում՝ Բողոքաբերը փաստացի զրկվել է վերադաս դատարանից իր յուրաքանչյուր էական փաստարկի վերաբերյալ պատճառաբանված պատասխան ստանալու իրավունքից, իսկ վերաքննիչ վերանայումը կրել է ոչ լիարժեք բնույթ»:

Դիմողը նաև նշում է, որ «Վերաքննիչ բողոքում նշված հիմքերը և հիմնավորումները ներկայացվել է նաև վճռաբեկ բողոքում, մինչդեռ Վճռաբեկ դատարանը, հանդես գալով Սահմանադրության 171-րդ հոդվածով նախատեսված սահմանադրական կարգավիճակով որպես Հայաստանի Հանրապետությունում բարձրագույն դատական արյան, որի խնդիրը օրենքների և այլ նորմատիվ իրավական ակտերի միատեսակ կիրառությունն ապահովելը և մարդու իրավունքների և ազատությունների՝ հիմնարար խախտումները վերացնելն է, նկատի ունենալով նաև, որ իր սահմանադրական լիազորությունների իրականացման բերումով առերեսվում է դատավարական

բողոքների մեծ քանակի և եռաստիճան դատական համակարգում իր քննությանը ներկայացված իրավունքի և փաստի ամենաբարդ հարցերի քննությանը, պետք է բնականորեն ունենա իր կողմից կայացվող վճռաբեկ բողոքը վարույթ ընդունելը մերժելու մասին որոշման պատճառաբանության խորության և ծավալի որոշման լայն հայեցողություն, որը Վճռաբեկ դատարանին կապահովի իր սահմանադրական գործառույթների արդյունավետ իրականացում՝ հաշվի առնելով արդարադատության արդյունավետության համար անհրաժեշտ գործոնների համադրումը, մինչդեռ սույն գործով Վճռաբեկ դատարանը չի ապահովել օրենքների և այլ նորմատիվ իրավական ակտերի միատեսակ կիրառությունը և չի վերացրել դիմողի իրավունքների և ազատությունների հիմնարար խախտումները»:

3. Ելնելով դիմումի և դիմումին կից փաստաթղթերի ուսումնասիրությունից, ինչպես նաև ղեկավարվելով «Սահմանադրական դատարանի մասին» սահմանադրական օրենքի (այսուհետ նաև՝ Սահմանադրական օրենք) 29 և 69-րդ հոդվածների պահանջներով՝ Սահմանադրական դատարանի դատական կազմը գտնում է, որ սույն անհատական դիմումով գործի քննությունը ենթակա է մերժման՝ հետևյալ պատճառաբանությամբ.

Սահմանադրության 169-րդ հոդվածի 1-ին մասի 8-րդ կետի համաձայն՝ *Սահմանադրական դատարան կարող է դիմել յուրաքանչյուր ոք՝ կոնկրետ գործով, երբ առկա է դատարանի վերջնական ակտը, սպառվել են դատական պաշտպանության բոլոր միջոցները և վիճարկում է այդ ակտով իր նկատմամբ կիրառված **նորմատիվ իրավական ակտի դրույթի սահմանադրականությունը**, ինչը հանգեցրել է Սահմանադրության 2-րդ գլխում ամրագրված իր հիմնական իրավունքների և ազատությունների խախտման՝ հաշվի առնելով նաև համապատասխան դրույթին իրավակիրառ պրակտիկայում տրված մեկնաբանությունը:*

Սահմանադրական վերոհիշյալ նորմն իր ամրագրումն է ստացել նաև Սահմանադրական օրենքի 69-րդ հոդվածի 1-ին մասում, որը սահմանում է այն հիմքերը, որոնց միաժամանակյա առկայության պարագայում ֆիզիկական կամ իրավաբանա-

կան անձը կոնկրետ գործով անհատական դիմում կարող է ներկայացնել Սահմանադրական դատարան: Դրանք են՝

ա) երբ կոնկրետ գործով առկա է դատարանի վերջնական ակտը,

բ) երբ սպառվել են ներպետական դատական պաշտպանության բոլոր միջոցները,

գ) երբ վիճարկվում է այդ ակտով իր նկատմամբ կիրառված **նորմատիվ իրավական ակտի դրույթի սահմանադրականությունը**, ինչը հանգեցրել է Սահմանադրության 2-րդ գլխում ամրագրված իր հիմնական իրավունքների և ազատությունների խախտման՝ հաշվի առնելով նաև համապատասխան դրույթին իրավակիրառ պրակտիկայում տրված մեկնաբանությունը:

Սահմանադրական օրենքի 29-րդ հոդվածի 1-ին մասի 1-ին կետի համաձայն՝ Սահմանադրական դատարանը գործի քննությունն ամբողջությամբ կամ մասամբ մերժելու մասին աշխատակարգային որոշում է ընդունում, եթե **դիմումում առաջարկված հարցերը ենթակա չեն Սահմանադրական դատարանին:**

Սահմանադրական դատարանն իր՝ 2009 թվականի մարտի 17-ի ՍԴԱՌ-21 աշխատակարգային որոշմամբ արձանագրել է, որ «(...) բոլոր այն դեպքերում, երբ դիմողը, ձևականորեն վիճարկելով օրենքի դրույթի սահմանադրականության հարց, ըստ էության բարձրացնում է այդ դրույթի կիրառման իրավաչափության հարց կամ հետապնդում է այլ նպատակներ, ապա այդպիսի դիմումները ենթակա են մերժման՝ (...) որպես սահմանադրական դատարանի քննության ենթակա հարց չառաջադրող դիմումներ»:

Սահմանադրական դատարանի դատական կազմն արձանագրում է, որ սահմանադրական կոնկրետ վերահսկողության առարկա կարող են դառնալ այնպիսի վեճեր, որոնց հիմքում դրված են **ոչ թե կոնկրետ գործի փաստական և/կամ իրավական հանգամանքների գնահատման, վիճարկվող իրավական նորմի՝ տվյալ գործով կիրառման կամ չկիրառման հարցեր, այլ վիճարկվող նորմատիվ իրավական ակտի սահմանադրականության գնահատման հարցեր:**

Սահմանադրական դատարանի դատական կազմը գտնում է, որ **Դիմողի կողմից բարձրացվել է այնպիսի հարց, որը ենթակա չէ** Սահմանադրական դատարանի քննությանը՝ հետևյալ պատճառաբանությամբ.

գործի նյութերի ուսումնասիրությունը վկայում է, որ սույն անհատական դիմումով Դիմողը, **ձևականորեն վիճարկելով** Հայաստանի Հանրապետության քաղաքացիական օրենսգրքի 317-րդ հոդվածի 2-րդ մասի, 337-րդ հոդվածի 1-ին մասի, Հայաստանի Հանրապետության քաղաքացիական դատավարության օրենսգրքի 379-րդ հոդվածի, 394-րդ հոդվածի 1-ին մասի 2-րդ կետի (իրավակիրառ պրակտիկայում դրանց տրված մեկնաբանության) սահմանադրականությունը, **ըստ էության, բարձրացնում է տվյալ դրույթների կիրառման իրավաչափության հարց:**

Այսպես՝ Դիմողն իր անհատական դիմումով, ի թիվս այլնի, ներկայացրել է դիրքորոշում, համաձայն որի՝ *«Սույն գործով Դատարանը, կիրառելով Օրենսգրքի 337-րդ հոդվածի 1-ին կետը հակընդդեմ հայցվորների հայցը մերժել է հայցային վաղեմություն կիրառելու հիմքով այն հիմնավորմամբ, որ «հայցային վաղեմության ժամկետը պետք է հաշվարկել հենց Վարկային պայմանագրի կնքման պահից՝ 26.08.2016 թվականից, իսկ հակընդդեմ հայցով Հայցվորները հակընդդեմ հայցադիմումը ներկայացրել են միայն 14.10.2022 թվականին՝ բաց թողնելով հայցային վաղեմության մեկամյա ժամկետը»:*

Դիմողներն իրենց անհամաձայնությունն են հայտնում Դատարանի այդ դիրքորոշմանը, քանի որ Դատարանը հայցային վաղեմության ժամկետի ընթացքի սկիզբը չի կապել օբյեկտիվ չափանիշի հետ, մասնավորապես՝ վիճահարույց գործարքի անվավեր ճանաչման և դրա անվավերության հետևանքների կիրառման մասին հայց հարուցելու իրավունքի ծագման սկիզբը գործարքն անվավեր ճանաչելու համար հիմք ծառայող հանգամանքների մասին Հակընդդեմ հայցվորների տեղեկանալու կամ նման տեղեկատվություն ստանալու օբյեկտիվ հնարավորության օրն է համարել՝ 16.07.2021 թվականը, մինչդեռ Դատարանի վերը նշված եզրահանգումը չի համապատասխանում Վճռաբեկ դատարանի որոշումներում կատարված մեկնաբանություններին, որոնք դիտվում են որպես նախադեպային նշանակություն ունեցող, հակասում են այդ դրույթներում պարունակվող բառերի և արտահայտությունների տառացի նշանակությանը, Օրենսգրքի կարգավորման համատեքստին և Սահմանադրության սկզբունքներին և նպատակներին, ուստի Դատարանի մեկնաբանությունները ոչ թե նպաստում են

իրավական որոշակիության ապահովմանը, այլ ստեղծում են լրացուցիչ անորոշություն»:

Դիմողը նաև նշել է, որ «(...) հայցային վաղեմության ժամկետի ընթացքի սկիզբը օբյեկտիվ չափանիշի հետ կապելու վճռորոշ հանգամանքը հաստատելուց հետո վերաքննիչ դատարանն ուներ բավարար փաստական և իրավական հիմք վճռի դեմ ներկայացված վերաքննիչ բողոքի քննության արդյունքով, իր լիազորության սահմաններում, ամբողջությամբ բավարարել վերաքննիչ բողոքը՝ ամբողջությամբ բեկանելով վճիռը, մինչդեռ վերաքննիչ դատարանը 15.09.2025 թվականի որոշմամբ վերաքննիչ բողոքը մերժել՝ թիվ ՇԴ/3074/02/17 քաղաքացիական գործով ՀՀ Երևան քաղաքի առաջին ատյանի ընդհանուր իրավասության քաղաքացիական դատարանի 17.12.2024 թվականի վճիռը թողել է անփոփոխ»:

Սահմանադրական դատարանի դատական կազմը գտնում է նաև, որ Դիմողն **իր անհամաձայնությունն է հայտնում թիվ ՇԴ/3074/02/17 քաղաքացիական գործով ՀՀ դատարանների կողմից կայացված դատական ակտերի բովանդակության առնչությամբ**: Մասնավորապես՝ Դիմողը վիճարկվող՝ Հայաստանի Հանրապետության քաղաքացիական օրենսգրքի 317-րդ հոդվածի 2-րդ մասի, 337-րդ հոդվածի 1-ին մասի, Հայաստանի Հանրապետության քաղաքացիական դատավարության օրենսգրքի 379-րդ հոդվածի, 394-րդ հոդվածի 1-ին մասի 2-րդ կետի (իրավակիրառ պրակտիկայում դրանց տրված մեկնաբանության) **հակասահմանադրականության որևէ հիմնավոր փաստարկ չի ներկայացնում**, իսկ որպես փաստարկ ներկայացվող դիրքորոշումներն առավելապես վերաբերում են խնդրո առարկա քաղաքացիական գործով **ՀՀ դատարանների գործողությունների (կայացրած դատական ակտերի) իրավաչափությանը**:

Սահմանադրական դատարանի դատական կազմը եզրահանգում է, որ սույն անհատական դիմումով Դիմողի բարձրացրած հարցի ըստ էության քննությունը ենթադրում է Սահմանադրական դատարանի կողմից ոչ թե վիճարկվող դրույթների (իրավակիրառ պրակտիկայում դրանց տրված մեկնաբանության) սահմանադրականության գնահատում, այլ թիվ ՇԴ/3074/02/17 քաղաքացիական գործով ՀՀ

դատարանների կայացրած դատական ակտերի իրավաչափության ստուգում, ինչը դուրս է Սահմանադրական դատարանի իրավասության շրջանակից:

**Ուստի՝ սույն անհատական դիմումով գործի քննությունը ենթակա է մերժման՝ Սահմանադրական օրենքի 29-րդ հոդվածի 1-ին մասի 1-ին կետով սահմանված՝ դիմումում առաջադրված հարցի՝ Սահմանադրական դատարանին ենթակա չլինելու հիմքով:**

Ելնելով վերոշարադրյալից և ղեկավարվելով «Սահմանադրական դատարանի մասին» սահմանադրական օրենքի 29-րդ հոդվածի 1-ին մասի 1-ին կետով՝ Սահմանադրական դատարանի դատական կազմը

**Ո Ր Ո Շ Ե Ց .**

Մարիամ Մարտիրոսյանի անհատական դիմումով գործի քննությունը մերժել:

Նախագահող՝

Անդամներ՝



Հ. Հովակիմյան

Ա. Զեյնալյան

Դ. Խաչատուրյան

27 մայիսի 2026 թվականի  
ՍԴԴԿՈ-48